

**NOGOMETNI/FUDBALSKI SAVEZ
BOSNE I HERCEGOVINE**



NOGOMET/FUDBAL BiH

P R A V I L N I K

*o uslovima koje moraju ispunjavati registracioni savezi za vršenje registracija
klubova i igrača na teritoriji NS/FS BiH*

Sarajevo, april/travanj 2016. godine

Izvršni odbor Nogometnog/Fudbalskog saveza Bosne i Hercegovine, na osnovu člana 35. Statuta NS/FS BiH, na sjednici održanoj 15.04.2016. godine, d o n o s i

PRAVILNIK

o uslovima koje moraju ispunjavati registracioni savezi za vršenje registracija klubova i igrača na teritoriji NS/FS BiH

Član 1.

Ovim Pravilnikom utvrđuju se uslovi koje moraju zadovoljiti registracioni savezi na teritoriji Nogometnog / Fudbalskog saveza Bosne i Hercegovine radi obavljanja registracija klubova i igrača u skladu sa Pravilnikom o registraciji, statusu i transferu igrača NS/FS BiH, te su isti obavezni poštivati Statut NS/FS BiH, odnosno Statute FS RS i NS F BiH.

Član 2.

Članovi NS/FS BiH donose odluku o davanju registracione nadležnosti savezima, a istu verifikuje Izvršni odbor NS/FS BiH.

Član 3.

a) Kao Opšti uslovi definisani su:

- Članstvo registracionog saveza u pripadajućem članu NS/FS BiH
- Broj klubova koji su registrovani u registracionom savezu

b) Kao posebni uslovi definisani su:

- Infrastrukturno - tehnički uslov
- Takmičarski uslov
- Administrativni uslov
- Normativni uslov

OPŠTI USLOVI

Član 4.

Registracionim savezima se smatraju:

- Područni/Kantonalni/Županijski nogometni/fudbalski savezi
- Opštinski/Gradski nogometni/fudbalski savezi

Kantonalni/Županijski nogometni/fudbalski savezi su udruženi u Nogometni savez Federacije Bosne i Hercegovine, i kao takvi se smatraju članovima NS/FS BiH.

Kantonalni/Županijski nogometni / fudbalski savez je teritorijalni Savez za teritoriju kantona/županije utvrđene onako kako je definisana Dejtonskim sporazumom, Ustavom BiH i Ustavom Federacije BiH, i isti su nadležni da vrše registraciju klubova i igrača za teritoriju koja im je teritorijalno pripadajuća.

Kantonalni/Županijski nogometni / fudbalski savez da bi mogao vršiti registracije klubova i igrača svih stepena takmičenja mora imati najmanje 6 (šest) nogometnih / fudbalskih klubova velikog fudbala (muškog ili ženskog), registrovanih u njegovo članstvo, a koji moraju biti uključeni u stalna takmičenja NS/FS BiH i NS F BiH.

Područni fudbalski savezi su udruženi u Fudbalski savez Republike Srpske i kao takvi smatraju se članovima NS/FS BiH.

Područni fudbalski savez je teritorijalni savez za područje više opština odnosno za jedan ili više opštinskih – gradskih fudbalskih saveza određenih Odlukom IO FS RS, te izuzetno od ovoga Područni fudbalski savez može biti teritorijalni savez za grupu klubova koji mu teritorijalno pripadaju određenih Odlukom IO FS RS.

Područni fudbalski savez da bi mogao vršiti registraciju klubova i igrača svih stepena takmičenja mora imati najmanje 6 (šest) fudbalskih klubova velikog fudbala (muškog ili ženskog) registrovanih u njegovo članstvo, koji su uključeni u stalna takmičenja NS/FS BiH i FS RS.

Opštinski – Gradski fudbalski savezi udruženi su u Područne fudbalske saveze, i kao takvi, članovi su Fudbalskog saveza Republike Srpske.

Opštinski – Gradski fudbalski savez je osnovni teritorijalni savez za teritoriju jedne ili više opština, određenih Odlukom IO FS RS na čijoj teritoriji vrši registraciju klubova i igrača.

Opštinski – Gradski fudbalski savez da bi mogao vršiti registraciju klubova i igrača svih stepena takmičenja mora imati najmanje 6 (šest) fudbalskih klubova velikog fudbala (muškog ili ženskog) registrovanih u njegovo članstvo, koji su uključeni u stalna takmičenja NS/FS BiH i FS RS.

POSEBNI USLOVI

Infrastrukturno - tehnički uslovi

Član 5.

Registracioni savezi moraju posjedovati vlastite prostorije, bilo da su iste u njihovom vlasništvu ili da su iste obezbjeđene putem zakupa prostorija, u kojima su obezbjeđeni adekvatni uslovi za nesmetano odvijanje kompletne djelatnosti za poslove registracija.

Registracioni savezi dokazuju posjedovanje vlastitih prostorija posjedovnim listom odnosno Ugovorom o zakupu prostorija.

Registracioni savezi treba da posjeduju vlastiti/e računar/e sa potrebnim aplikacijama za potrebe registracija, kao i ostalih poslova koji proizilaze iz opisa djelatnosti saveza, sa osiguranom kvalitetnom internet konekcijom koja omogućava nesmetano pristupanje internetu (COMET informacionom sistemu), štampač i skener za računar, telefon/telefaks sa vlastitim korisničkim brojem, kao i fotokopir aparat.

Registracioni savezi treba da posjeduju odgovarajući kartotečni ormar za arhiviranje registracione dokumentacije koju odlažu kao obavezujuću dokumentaciju za registraciju klubova i igrača, a u skladu sa Pravilnikom o registraciji, statusu, i transferu igrača NS/FS BiH.

Registracioni savezi, treba da imaju implementiran informacioni sistem COMET koji se primjenjuje u obavljanju poslova registracija klubova i igrača, te u svrhu pristupanja COMET informacionom sistemu mora postajati ovlašteno lice od strane IO registracionog saveza, a koje ispred registracionog saveza pristupa informacionom sistemu COMET sa utvrđenim korisničkim imenom i lozinkom, unoseći potrebne podatke u sistem na način kako to predviđa Uputstvo za primjenu informacionog sistema COMET i Pravilnik o registraciji, statusu i transferu igrača NS/FS BiH.

Administrativni uslov

Član 6.

Registracioni savez mora imati minimalno jedno zaposleno lice po osnovu Ugovora o radu na određeno ili neodređeno vrijeme shodno Zakonu o radu.

Kao dokaz o zaposlenju lica registracioni savez prilaže Ugovor o radu na određeno ili neodređeno vrijeme.

Lice koje je zaposleno u registracionom savezu kao uslov za vršenje poslova registracija klubova i igrača mora posjedovati minimalno srednju stručnu spremu SSS, kao i poznavati rad na računaru uz poznavanje osnovnih računarskih programa (Windows, Word, Excel, Internet Explorer i sl.), te aktivno poznavati informacioni sistem COMET koji je namijenjen za potrebe registracija klubova i igrača odnosno transfera igrača.

Registracioni savezi moraju imati organizovano osmočasovno radno vrijeme kao jednokratno radno vrijeme ili kao dvokratno radno vrijeme, koje obavezno mora odgovarati klubovima sa teritorije registracionog saveza kako bi mogli obaviti svoje poslove iz nadležnosti registracionog saveza predviđenih Pravilnikom o registraciji, statusu i transferu klubova i igrača NS/FS BiH.

Član 7.

Registracioni savez koji obavlja poslove registracije klubova i igrača mora imati organizovanu Komisiju za registraciju klubova i igrača, a koja broji tri (3) člana od kojih je jedan predsjednik i dva člana, ili ovlašteno lice koje je od strane IO-a registracionog saveza imenovano kao registracioni sudija, a koji registracione poslove obavljaju u skladu sa odredbama Pravilnika o registraciji, statusu i transferu klubova i igrača NS/FS BiH.

Poslove sekretara Komisije za registraciju obavlja lice koje je zaposleno u Savezu.

Komisija za registraciju igrača ili registracioni sudija obavlja registracione poslove u skladu sa Pravilnikom o registraciji, statusu i transferu klubova i igrača NS/FS BiH, te o održanim sjednicama Komisije i izvršenim registracijama vodi Knjigu zapisnika sa održanih sjednica, čije stranice moraju biti numerisane i ovjerene, uz obavezu, da nakon svake sjednice zapisnik mora biti potpisan od strane članova Komisije i sekretara.

Pored navedenog, Komisija za registraciju ili registracioni sudija vodi kartoteku registrovanih igrača po klubovima, kao i kartoteku registrovanih klubova koji su članovi registracionog saveza, i istu uredno arhivira nakon svake održane sjednice.

Takođe, Komisija za registraciju ili registracioni sudija putem svoga sekretara, dužna su, nakon svake održane sjednice podatke o registraciji igrača odnosno kluba, kao i sve promjene u registraciji igrača i klubova koje proizilaze iz Pravilnika o registraciji, statusu i transferu klubova i igrača NS/FS BiH, a u smislu zaključenja ugovora, sporazuma o ustupanju, raskida istih, brisanja iz registra, prelaska iz kluba u klub, i sličnog, unijeti u informacioni sistem COMET na način kako je to predviđeno Uputstvom o primjeni informacionog sistema COMET, i u skladu sa Pravilnikom o registraciji, statusu i transferu igrača i klubova NS/FS BiH.

Komisija za registraciju igrača ili registracioni sudija nakon svake održane sjednice dostavlja zapisnik o registraciji klubova i igrača (tekst za objavu) u nadležni savez za objavu igrača i klubova u Službenom glasniku FUDBAL/NOGOMET.

Komisija tekst za objavu i dokaz o uplaćenju taksi za objavu dostavlja nadležnom savezu u skladu sa članom 48. i 49. Pravilnika o registraciji, statusu i transferu klubova i igrača NS/FS BiH.

Normativni uslov

Član 8.

Registracioni savez mora da ima status članice Entitetskog saveza koja je od strane istoga predložena Izvršnom odboru NS/FS BiH za obavljanje poslova registracije klubova i igrača, o čijoj registracionoj nadležnosti konačnu odluku verifikuje Izvršni odbor NS/FS BiH.

Član 9.

Registracioni savez da bi mogao vršiti registracije klubova i igrača mora ispunjavati sledeće normativne uslove:

- Da posjeduje Rješenje nadležnog organa da mu je odobren rad i da je registrovan kod nadležnog suda odnosno nadležnog organa.
- Da je važeći Statut usklađen sa Statutom pripadajućeg entitetskog saveza odnosno Statutom NS/FS BiH, te da je isti ovjeren od strane nadležnog organa.
- Da posjeduje važeće Rješenje o licima za predstavljanje i zastupanje registracionog saveza izdato od strane nadležnog organa.
- Da posjeduje aktivan transakcijski bankovni račun kod jedne od komercijalnih banaka u Bosni i Hercegovini putem koje vrši poslovanje.
- Da lica koja su od strane Statutom nadležnog organa registracionog saveza imenovana kao ovlašteni potpisnici odgovaraju deponovanim potpisnicima kod komercijalnih banaka putem kojih registracioni savez vrši poslovanje.
- Sve promjene moraju biti blagovremeno upisane kod nadležnog suda ili drugog nadležnog organa, te registracioni savezi moraju posjedovati važeću dokumentaciju sa upisanim promjenama izdatu od strane nadležnog organa. Također, moraju posjedovati sve važeće odluke, uredno potpisane i ovjerene, a koje su donesene od strane IO-a registracionog saveza, odnosno odgovornih osoba, a vezano za rad registracionog saveza.

Pored navedenog registracioni savezi su obavezni ispunjavati sledeće:

- Da uredno izmiruju obaveze prema zaposlenima u skladu sa Zakonom o radu.
- Da uredno izmiruje obaveze prema nadležnim finasijskim i poreskim organima.
- Da redovno održavaju godišnje Skupštine o čemu podnose izvještaje pripadajućem entitetskom savezu.

Takmičarski uslov

Član 10.

Da bi imao registracionu nadležnost, registracioni savez je obavezan da rukovodi barem jednom od liga velikog nogometa / fudbala, bez obzira na uzrasnu kategoriju. Takvo takmičenje se administrativno obavezno mora voditi putem COMET informacionog sistema.

Nadzor – inspekcija nad registracionim savezima

Član 11.

Izvršni odbor NS/FS BiH nakon donošenja Odluke o registracionoj nadležnosti saveza koji vrše registraciju klubova i igrača na teritoriji NS/FS BiH imenovaće tročlanu komisiju kao inspekcijski organ koja obavezna vršiti inspekciju rada registracionih saveza jedanput godišnje, te o izvršenoj inspekciji sačiniti inspekcijski izvještaj i mišljenje koji dostavlja Izvršnom odboru NS/FS BiH.

Inspekcijski organ imenovan od strane IO NS/FS BiH broji tri člana koji se sastoji od po jednog predstavnika Generalnih sekretarijata NS/FS BiH, FS RS i NS F BiH.

Član 12.

Da bi registracioni savez moga imati registracionu nadležnost mora ispunjavati sve Opšte i Posebne uslove predviđene članovima 4.,5.,6.,7.,8. i 9. ove Odluke.

Član 13.

Ukoliko registracioni savez ne ispunjava bilo koji od uslova propisanih ovim Pravilnikom, isti ne može imati registracionu nadležnost za vršenje poslova registracije klubova i igrača.

Završne odredbe

Član 14.

Entitetski savezi su dužni postupiti po ovom Pravilniku u smislu sprovođenja istog i vršenja pripreme za predlaganje registracione nadležnosti pripadajućih Saveza.

Član 15.

Pravilnik stupa na snagu danom donošenja i ist će se početi primjenjivati 6 (šest) mjeseci od dana objave u Službenom glasniku NS/FS BiH. U navedenom roku od 6 (šest) mjeseci, registracioni savezi su dužni ispuniti sve uslove propisane ovim Pravilnikom.

Predsjednik

Elvedin Begić,s.r.